

Segun Sr. Rudy Lampe di partido RED

Aruba tambe mester cuminsa acepta matrimonio entre personanan di e mesun sexo

ORANJESTAD- Declaracion di Prome Minister, Sr. Mike Eman, unda cu na number di Gobierno di Aruba y partido AVP, Sr. Eman ta declara di no ta na favor di matrimonio di mesun sexo, na Aruba, lider di partido RED Democratico Sr. Rudy Lampe, a vocifera lo siguiente. Na prome luga, e declaracion aki ta cuchiu den lomba di propio parlamentario Mr. Desiree Croes, kende a casa na Hulanda cu un persona di su mesun sexo y cu ta bogando pa, den number di e comunidad gay na Aruba, esaki ta posibel na Aruba. Esaki segun declaracionnan di Sr. Rudy Lampe, durante conferencia di prensa semanal di Partido RED.

DISCRIMINACION

Sr. Lampe ta tuma como ehempel, cu 150 aña pasa, na Aruba hendenan no tabata por a casa pa ley pa motibo di a nace catibo y colo scur. Y awo, atrobe no mag casa na Aruba pasobra nan a nace 'gay'. Segun Lampe, un persona asina tambe ta bin di mama y tata. Pero simplemente, nan preferencia sexual ta otro. Ta discriminando Arubianonan, djis a base di preferencia sexual. Djis pasobra a nace gay, ta wordo discrimina pasobra no a nace straight. Un persona gay mes-



Sr. Rudy Lampe di Partido RED.



Prome Ministro Mike Eman.

ter tin mesun derecho cu un persona straight. Lampe ta sigui bisa cu, Prome Minister Mike Eman a bisa cu no tur Arubiano ta igual. E mensahe aki, di discriminacion ta dificil como partido di principio, na favor di derechonan humano, por acepta. Ora di papia di matrimonio gay, ta papia aki di un contract civil, pa proteha nan derechonan material. Y cu nan por tin derecho di adopta yiunan. Y segun Sr. Lampe, no ta trata aki di mama of tata. Nan mester splica e yiu adopta cu nan tin mama y tata biologico cu no ta nan.

DERECHONAN HUMANO

Sr. Rudy Lampe ta termina bisando cu discriminacion di un persona basa riba su preferencia sexual ta violacion di nan derechonan humano. Tur persona tin derecho humano, segun articulan 18 a 21, unda "cu cada persona tin derecho na tin libertad di pensamiento, consciencia y di religion. E derecho aki ta inclui e libertad di cambia di religion of di creencia. Tur individuo tin derecho na e libertad di opinion y di expresion, e derecho ta inclui e derecho di no wordo molestia pa motibo di su opinion, di investiga y ricibi informacion y opinion". □